

江陰縣志卷之九

風俗

政治得失而祥異因之風俗美惡而興革從之風俗者治化之原人心之驗也舊志稱美而不稱惡今則奢儉正頗與俗尙占驗里巷諺語並著尤於時弊慨乎其言之夫移風易俗司牧之事而士與有責焉居官以正人心立維風俗之本居鄉以惇孝弟端維風俗之基此名宦人物所自出也志風俗

四民

吳都賦云士有堅貞之行俗有節概之風雖概稱吳地而

江陰縣志

卷九

風俗 四民

一

江邑尤爲近之宋葛邲謂得江山之助故其人秀而多文有淮楚之風故其人愿而循理黃志云上士畏義篤道貞白淳固富貴不能蕩其心生死不可易其介中士瓌詞傑作可與珠玉爭光下士不欲矯世以沽名且爾從衆而同俗趙志云後生晚出皆知慕效前輩談古文章論字法其闊略不修學者毀節仕者貨法衆共不齒馮志云自隆萬以來人品文品俱矯然自立不屑逐世博名以故忠烈挺生垂光載籍昔人論士如此我

朝久道化成俗益淳茂白

國初至乾隆間薦紳舊族厲名節崇禮讓勇於爲義凜然不

可干以私寒峻之士孤介自守同人相聚問學切劘作
為文藝崇根柢而不尚浮藻大都考文徵行略如葛邲
諸人所云雖屢變而不離其宗迄今數十年間風會稍
遜其砥行立名者倍兢兢云延恩念士為四民表率甫下車他務未遑以端士習
剴切勸諭旋即觀風以惇崇孝弟搜訪賢才諮詢民俗
利弊為主令各據實指陳不作時藝試帖先期飭閭邑
生童領卷期以十日集卷擇尤分日覆試平日恒以先
行後文嚴義利重廉恥諄諄勸戒書院除逢縣課躬詣
肩試逐卷披閱拔尤加獎外恐諸生心紛外務每月加
字課六卷恭默聖諭廣訓隆學校以端士習一條不惟藉以習楷深望日擊道存束身軌物更設署課
招致文士集賓廳講論道藝因恐妨寒峻塾課未多舉
行斯邑為人文淵藪積年得山長校官啟迪之盛賢士
大夫觀摩之益士習頗蒸蒸日上附誌以見舊志嘉獎
之非誣

江陰縣志

卷九

風俗 四民

二

農之家十居八九農無田而佃於人者十居五六農人自
食其力歲收豐歉一家之盈絀係焉故三時耕作不敢
不勤惰游者尚鮮其佃於人者視年上下按額償租是
為良佃若奸佃則或一田兩賣謂之樓賣欠租不償將
田轉權而私收其值謂之盜權秋成稍歉強悍者倡首
抗欠羣相效尤謂之霸租復有以糠粃土塊攙和米麥
捏交甚至用水潮濕輒至霉爛尤為惡習至設立保甲
原為弭盜衛農不令催糧今則黠保奸胥以多田之家
報充甲長遇有欠戶勒令代完民或因此破家則復報
一人以充數又青黃不接之時室如懸罄牟利之徒乘

其急乏貨以米石而故昂其值謂之放黃米一俟新穀登場按月計利清償至有數石之穀不足償一石之米者貧農之苦殆不堪問就而論之奸佃不懲業田之家困奸胥不戢業農之家尤困交相困而上虧國課下乏蓋藏鮮不由於此也

延恩蒞任遇頑佃抗欠察非實貧者懲不少貸憫甲長賠累嚴禁差役需索惟借黃米債一節如渴飲鴆尤為今日重困然只禁富戶盤剝而不與以告貸之路則貧民益無以為生現諭董清釐社倉為貧民支借計并於保甲中力勸廣建義倉期重債不禁而自絕附誌以誌後來

工作無奇巧金銀銅錫稍佳鐵最粗惡銀工善盜銀石工染吳會風氣漸趨精巧木工分大小匠大匠營造小匠製器具自嘉慶以來有力者多造房屋工用遂廣小匠

江陰縣志

卷九

風俗 四民

三

器具亦益精土工築垣運甃外無他長陶工以土色非宜恒至苦窳故東南鄉西鄉雖俱有窰僅燒磚瓦竹工無細製染工多溧水人畫之善者不可為工工則粗解繪事而已合各工較之木工勤作不苟為上土工窳惰為下

土人重農逐末者寡其行賈於外惟布穀木棉豆餅雜物近在淮揚遠及襄漢而已外此則積囤米麥居多典業在乾隆以前皆徽商今則大半皆土著也居停客貨平章市價而低昂之謂之牙行負販各物營微利以自給謂之經紀布牙則惟西鄉日市餘皆以天色未明張燈

交易日出而罷其短陌攬私雖市肆常有而夜市為甚且婦穉帶星貿易途遇奸宄間有攫取者四門米行升斗大小不同因之價值不一木行大者接西客小者在郡垣接本郡販客或在金陵接上河販客木有西木廣木之分價有起貫展貫之別丈尺有老箴同箴之異他如農田各器耕牛豚豕等畜春夏間某鄉某鎮俱有集期有古交易而退各得其所之風焉大率商賈習俗富則教子讀書貧則依人謀食勢使然也蕩檢者尙少布莊夜市始見黃志自前明迄今積習相沿延恩力懲其弊而眾說紛紜堅執習俗相安之見幾難挽回經屢諭議禁力加懲創今甫改為自清晨至日昃而罷通飭城鄉布牙具結遵禁其短陌攬私及米行升斗不同情弊確

江陰縣志

卷九

風俗 四民

四

鑿悉行嚴禁特恐行之一時而不能持之以久附誌以期永遠禁止

婦女

衣冠士族婦女率閒靜莊慎無穠麗冶游之習中人家織紵鍼黹惟其所習農婦專事紡績兼饁餉之勞輕猥衰蕩漸染不及風亦淳矣近時觀優禮佛漸不加檢而守禮者尙不隨波靡云嫠婦貧苦無依不得已而改適本婦矢志守貞親屬圖謀田產強逼改嫁者始則甘言引誘繼則凌逼百端婦倘不從引匪類硬作媒証乘夜肆行強搶以致奪志傷風甚有嫠婦冤憤自盡者味良敗化至斯已極延恩以此種案件層見迭出為之髮指雖疊示嚴禁并屢經嚴辦風猶未息念嫠婦力能遞呈申訴者十不一二而控案者尙接踵而至此外無力含冤者更不知凡幾故於查竣保甲後刊發大書嚴禁逼醮搶醮告條許本婦及牌甲扭送俾有犯必懲稍知斂

哉特書於此敬告同志
永維苦節永懲刁風

二氏

僧有清修應付二種清修戒律精嚴十不得一應付飲酒
食肉禮懺則音樂鼓吹儼同戲劇道士稍有術者解祈
晴雨書符籙餘則作齋建醮與應付僧同別有火居道
士家室妻子無以異人其黠者朋比師巫矯誣神鬼以
誑民財女尼間有守規矩勤諷誦者而少年敗壞清規
者亦復不少更有所謂坐期場作佛會於寺宇寬廣之
所不分男女醮分輸金雜選羅拜內一人自號佛頭鈔
撮鄙俚詞句對衆朗誦名爲宣卷雜坐至三四晝夜或

江陰縣志

卷九

風俗

婦女

二氏

五

旬餘不止四鄉及附郭俱有之此又二氏之波流不已

大壞法門者也

現奉憲檄遵

旨通飭嚴禁婦女入

廟燒香丁男坐會念佛如邑城北門外
三月二十八日東嶽廟會徹宵達旦男女混雜爲
尤甚今皆先期示禁委員查拿所當永久欽遵

遊民

民無職業者放蕩不檢往往三五成羣飲博打降夥謀誘
詐或舞弄刀筆散其徒黨探刺官民雜事構釁告訐一
人佯出從中恐唬取財或甲與丙同謀訟乙故訟丙爲
乙黨令丙陽助而陰擠之均謂之串詐遇有司親自收
狀當堂審駁者其風稍息有一等無藉疲民爲有司卯
差奔走謀取印票騷擾鄉民酒食舟車需索無厭名曰

白役復有情游失業探聽慶弔等事十百為羣強索錢物名曰秋風至搖攤聚賭花鼓灘簧破家喪身傷風敗俗尤屬四鄉惡習黃志有云沿江居民遇客船滯閣則嘯其黨剽掠之并其船剖分之月城居民深夜運土塞河客過而舟膠乃倩以分剝因攫奪其貨物近雖不至若是之甚然亦竊運磚石乘夜擲河膠阻客舟以索錢物西鄉申港後梅各村落竊匪甚於他處甚有牛隻被竊轉向其魁贖取禁令雖嚴其風未之息也地棍擾害姑息訟師舞弄刀筆九當剪除延恩逢放告收呈常以不濫准准即審審即結九字時凜諸心於不濫准三字尤為緊要蓋少准一呈不特令健訟者無所施其串詐之技即畏訟良民亦少受經差索詐之害近來無情誣

江陰縣志

卷九

風俗

遊民

六

捏之風稍戢紳衿則事不干已僉知自愛裹足不前矣灘簧賭博一切惡習論禁非不嚴明訪拏仍難淨絕現行保甲諭牌首甲首議禁議罰諺云官禁不如私禁旨哉斯言黃志所載沿江月城兩地膠舟剽奪情事數百年來風移俗變有異曩時竊匪自設立自新所豢養後兩年來絕少逾貫報案惟偷牛勒贖重為農困實舊志未著之惡俗屢經嚴辦宰殺盆塘冀遏其流特明著聚匪銷贓地方以期訪獲重懲無令滋蔓

通尚

古禮不盡行冠禮惟明萬歷間知縣劉守泰為所拔士周從文詣學一行婚禮親迎惟

國朝乾隆間知縣蔡澍下令邑中士族行之今已久廢惟以綵輿鼓吹有爵者牌扇旌蓋媒僮導行交拜合昏諸儀得古禮大略而已喪禮用音樂尚浮屠舉殯既卜日前

一二日受弔晚設奠曰唐祭卽古祖奠意厥明引柩赴墓儀從盛者載路里許衰麻哭泣都不戾於古惟堪輿不能無惑鄉民朝死夕葬富人謀吉兆不得有淹滯數十年者矣祭禮有祠者多以春秋二仲祠祭無則祭於堂祠之有無祭品之隆殺視其子孫之家財不衷古禮以卿大夫士庶民爲等差也其他所祀無常惟祀五通爲惡俗香花牢醴皆極盛召戚黨張樂設筵以道士祝之詞甚鄙俚名曰茶筵且必以夜必夫婦親之達旦而後已所費動數十金淫祀無福可謂至愚右婚喪祭祀大端若此至如賓朋宴集交際之文宮室輿馬飲食衣

江陰縣志

卷九

風俗

通尙

七

服之用類皆厭樸陋尙華侈不知今日之儉已敵往昔之奢康熙間米石七百肉筋三十明萬厯間修廣福寺碑載豆油十石銀十二兩三錢較之今日物價不啻倍

蓰況又從而侈之何以善其後乎

俗去太甚冠禮久不行詢斯邑昏禮及家

祭禮雖不盡合於古從宜從俗尙無悖誤惟葬禮在城則失之太遲在鄉則失之太速遲葬固干例禁而速葬至朝死夕埋尤傷孝治其速葬之由因每遇喪家前後數村攜挈男女聚坐蠶食如擇期安葬索食如前在富者力可支持爲親應不惜費貧民賣田鬻產何堪兩次聚食故不得已而速之且斯邑喪事飲食之費重於棺槨逼婦改醮之案被控者多以抵用費藉口人家不幸而遭死亡凡民有喪匍匐救之謂何乃可乘喪使人破產且使人因而速葬其親以傷孝治乎今於清查保甲後按牌甲刊發大書嚴禁乘喪蠶食告條違卽扭稟俾各觸目警心除陋俗以厚民風至五通淫祠現奉憲飭遵旨拆毀業經出示奉行近聞鄉城愚民病不

服藥見婦女肝火上炎兩頰微紅聽信司巫指為邪病以致破產棄家傷廉敗化嗣後吾民病宜延醫服藥切不可再為邪說所惑致干功令

勸諭親迎約

國朝知縣 蔡澍

竊惟夫婦為人倫之首閨門實起化之原是以詩詠關雎書美釐降易首乾坤春秋譏不親迎凡以二姓之交嚴配耦廣似續所係甚鉅不可不慎也攷之婚禮日問名矣納采矣納吉納徵矣儀節亦云畢具而殿之以親迎日婿至婦家親迎既奠雁御輪而先歸俟於門外婦至則揖以入先王制禮豈故多其曲折以為束縛斯人之具哉蓋天下事必慎重於始而後可永好於終如谷風陰雨及氓之蚩蚩二詩朱傳皆謂婦人為人所棄而作所以然者以禮教不修縱欲昧理合之甚易故離之不難也先王逆知天下後世必有茂禮相從中道棄捐而乖夫婦之經者故制為六禮以閑之蓋曰必如是而後為夫婦一禮不備則亦猶之苟合而已矣我江邑地介三吳素稱文物之邦喪祭禮儀頗為近古即婚姻之家卜吉聘定亦猶彷彿古人納采問名之遺意獨親迎

江陰縣志

卷九

風俗

通尚

八

一節無論城鄉士民則概未有行之者夫女子之守貞待字非過難也蓋天理當然有不如是而不可者故其始也問名納幣已極禮物之周詳而于歸之夕又有夫子執贄相迎所以謹匹配之交作兩姓之合者無不鄭重備至如是而往從之則陽往陰來既無輕身之嫌夫先婦後已見唱隨之義此夫婦一倫所由與君臣父子昆弟朋友並昭天壤永垂不敝也自親迎之禮不講未見良人之出戶忽觀邦媛之入門婚媾無文苟且相就其與無媒而自合者相去曾幾何哉迨其後也或終風而悼謔浪或抱布而謀賄遷或曰愛已弛矣黃衣亦可為裳或曰傷哉貧也糟糠何妨易米更或磨笄方新輒赴相如之約抑或兩髦如舊忽傳紅拂之奔甚且人盡夫也奚蘼蕪之關心宛其死矣樂他人之入室種種乖張俱傷倫化溯其由來皆為婚禮不明親迎久廢遂使夫婦之間視同陌路風俗至此此亦司土者所當急為轉移者也請與江邑紳士民人約城廂為四鄉之觀瞻復古禮當自城廂始紳士為四民之標準端化源當自紳士始紳士循禮則庶民協應城廂循禮則草野向風將見自貴及賤無不親迎之家由近暨遠罔非親迎之俗教化興而風俗同由是編之志乘書曰江邑親迎之

天子特

禮自某年某月某令泣任始異日太史採風輶軒問俗
謂海隅僻壤猶存古風也豈非彬彬盛事哉況今
命儒臣纂修三禮行將頒行天下永垂法守則親迎之
禮尤

本朝

令甲所在不可違玩隕越者也如以某之言為迂誨之
諄諄聽之藐藐縱習俗相沿不能繩之以法諸紳士民

國家

之令典其何以自處耶蓋庶民興則感激奮發而轉移
有力某為四民重期之士君子有移易化導之責者也
匹夫而化鄉人古有其語況紳士躬行倡率有不風流
令行乎於紳士尤有厚望
焉各其諦聽無厭髦言

右節采前志參以近時習俗不敢妄為諱飾延恩自泣
斯土時以教養為重更有事禕風俗屢諭飭行而未經
議覆及尙未具舉者附存其目敬諭後之同志以冀非
託空言

江陰縣志

卷九

風俗 通尙

九

鄉飲酒禮 訓俗型方莫善於行鄉飲酒禮行斯禮必慎
選邑中高年碩德之人為賓介不得以虛譽

無實者濫與斯列久經
移學選舉未准議覆

養老會 狎侮老成有關風化高年失養尤屬堪憐今諭
就近集貲養就近老者使後生小子皆知尊敬

即皆知嚴憚以厚
風俗尙未通行

恤孤義塾 節婦望其子讀書成立尤切孤兒不得讀書
更為可憫今諭城鄉廣建恤孤義塾專為孤

兒讀書之地以表異凡民洵於敬節養
蒙大有裨益屢經苦口勸諭尙未通行

種樹 斯邑三十三山皆童屢諭種樹以開自然之利而
未見遵行者殆艱於開墾防守遂畏難中止耳斯

民之利在斯民之自取若維持
防範之守土者固不憚煩勞也

養蠶 斯邑鄉民多藉紡織度日而比年水棉常貴布值
常賤所以小民生計益艱諄諭農佃兼種桑養蠶

以防布滯
尙未遵行

積穀斯邑戶鮮蓋藏諄諭仿行武陽積穀會在城按圖

集貲存典生息在鄉捐穀公貯力敦任卹以備凶

荒今方論董清查社倉積穀兼

勸廣積查辦伊始尚未據稟覆

沙洲義學地逼大江風氣剛勁每因爭奪沙田釀成巨

秀良諭勸好義者共建義塾於沙洲俾

其子弟多讀書以變化氣質尙未遵行

楊舍同善堂斯鎮民多樂善建堂做城中公善堂行贈

恤孤二事尙闕簽諭議增願卽日

奉行載入新志爰類及以誌厚望

歲時

歲元旦放爆竹啟門肅衣冠拜祖先隨拜父母以次揖賀
出赴師長尊行家展謁以及等夷親交立春前日有司
官迎春東郊綵亭鼓吹裝演戲劇故事自迎春館擁太

江陰縣志

卷九

風俗 通尙

十

歲土牛至縣治達旦祀勾芒神於儀門東擊鼓者三繞
土牛三匝而鞭之樂工以小春牛分送官府搢紳正月
五日記五路神十五日上元節龍馬獅子諸燈競作各
廟俱張燈設樂城隍廟爲最盛搓粉爲丸曰團圓以糯
穀投焦釜曰爆字婁又曰卜流花以占休咎上元後營
官迎喜神甲冑旗幟嚴整煥爛近年罕見矣寒食爲百
五節男女以麥葉簪髮清明掃墓間有墓祭者冢上標
以紙錢三月二十八日爲東嶽誕辰城隍神賽會登山
旌旗輿衛闐咽街衢觀者如堵四月八日僧尼作浴佛
會十三日申港季子墓集場商賈輻湊買農具者悉赴

蓋是日爲季子誕辰士人咸往謁墓因而成集亦見愛慕前賢者衆也午日泛蒲觴食角黍門懸艾符婦女簪繭虎彩勝龍舟競渡南自五雲橋北抵閘口畫舫笙歌中流間作不及郡城什一也夏至食餛飩六月十九日廣福寺作觀音會雜賣惠山泥人耍貨兒童爭購以爲戲七月七日夕穿鍼乞巧或有以盆盛水曝日中拋鍼浮影驗其巧拙者中元食茄餅盛舉盂蘭盆會晦日以五色紙作燈燃於地曰地藏燈衢巷皆徧中秋食月餅并相餽遺以香爲斗置高臺焚之曰燒斗香競設酒肴瓜果以玩月二十四日以粉糲祀竈重九日食重陽糕

江陰縣志

卷九

風俗 歲時

十一

翦五色紙旗插其上以祀先及竈登高至君山挈榼小飲霜降節營官迎霜隊伍一如迎喜今亦罕見十月朔掃墓略如清明冬至賀履長節臘月八日雜果蔬爲粥曰臘八粥二十四日送竈神翦紙爲旗蓋輿馬延羽士諷經禮送掃舍宇是日丐者花面插羽儼於市曰跳竈王除夕插松柏於檐端祀神祭祖畢懸祖先畫像封井接竈以白堊畫地作弓矢飛錢米囤之形換桃符春帖老幼圍鑪或達旦不寐謂之守歲爆竹聲恒終夜不絕今則偶聞聲響亦以見生計之絀也

農占

元旦侵晨風自東南來歲大稔其次東風又其次東北風
遇西風則歉七日爲人日晴則少疾疫八日爲穀日昏
時看昴宿去月幾何若星與月逼是爲參星過月主旱
否則多水立春日宜晴暖二月十二日爲花朝晴則百
果熟社日宜雨三月三日聽蛙聲午前鳴高田熟午後
鳴低田熟十一日麥誕四月四日稻誕皆喜晴八日夜
雨傷小麥十三日雨麥歉收十六日晴則水雨則旱惟
陰雲爲佳十八日雨高鄉無收立夏太陽無暈早有暈
水芒種後壬日爲梅恒多雨半月忌雷端午日雨主來
年大熟夏至日起時時分三候每時五日中時雷多雨
江陰縣志

卷九

風俗

農占

三

五月甲申乙酉日雨則大水二十日爲大分龍次日雨
主豐稔立秋日忌雷立秋後忌虹處暑不雨禾大耗八
月二十日爲稻藁誕宜晴小雪有雪主穀賤十月朔清
和一冬少寒十一月十七日爲彌陀誕早起占風南風
米貴北風米賤冬至後第三戌爲臘臘前三番雪名曰
三白主來歲大豐

諺語

年朝烏鹿禿高低一齊熟未蟄先蟄一百廿日陰濕春雷
須見冰弗冰弗肯晴二月逢三卯棉花貴如寶三月無
三卯田家米不飽三月溝裏白溝底一畝麥麥秀風搖

稻秀雨澆低田只怕迎梅雨高田只怕送梅雷黃梅寒
井底乾時裏寒沒竹竿二十分龍廿一雨石頭縫裏多
是米二十分龍廿一鬣拔了黃秧便種豆小暑一聲雷
四十九日倒黃梅六月初三一個陣上晝芸田下晝困
六月弗熱五穀弗結伏裏西北風臘裏船弗通朝立秋
涼颼颼夜立秋熱到頭秋分在社前斗米直斗錢秋分
在社後斗米直斗豆九月十三晴釘靴掛斷繩十月初
一西北風糴新米糶冬春立冬晴魚滿汀小雪雪米賤
極臘月雷地白雨來催兩春夾一冬無被暖烘烘除夜
犬不吠新年無疫癘日落雲裏走雨落半夜後日沒胭
脂紅無雨但有風月如仰瓦不求自下月如掛弓少雨
多風久晴防戊雨久雨望庚晴朝華夜華無水澆瓜行
子春風有夏雨落子臘雪有禾登戊子己丑甲寅晴四
十五日滿天星夏至酉逢三伏熱重陽戊遇一冬晴春
雨甲子赤旱千里夏雨甲子乘船入市秋雨甲子禾頭
生耳冬雨甲子雪飛不已

方言

虹曰鬣坎曰潭孔曰洞支港曰浜堂庭曰天井箸曰快托
盤曰反供飲食曰吃器物曰家生日末事覘人曰張足
曰穀何物曰到則曰舍個如何曰那呢六畜曰中牲認

曰佞扶曰檔捧曰掇首飾曰頭面翟姓曰宅盛姓曰綻
章姓曰臧季姓曰據吳姓曰洪兒曰倪歸曰居大曰杜
惟大黃大蒜大麥曰代學曰斛

江陰縣志卷之九終

江陰縣志

卷九

風俗

方言

十四